

# Dithero tsa Tirelano mo Kutlwanong

12/2015 Thero ka Sontaga o o bidiwang Septuagesime, e le ka 01. 02. 2015

## Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go Dan. 9:18, le re: **"Ga re ikanye ditiro tse di siameng tsa rona, fa re baya mekokotlelo ya rona fa pele ga gago; mme re ikanya mautlwelo-botlhoko a magolo a gago."**

1. Sefela sa 186 - 172/179
2. **Thapelo:** "Ba itshepise ka boammaaruri; lefoko la gago ke lone boammaaruri," Joh. 17:17. Amen.
3. Lefoko la Testamente e kgologolo le kwadilwe mo go Jeremia 9:23-24; Epistolo ka fa thulaganyong ya 2 e kwadilwe mo go 1 Bakorinthe 9:24-27; Efangele ka fa thulaganyong ya 3 e kwadilwe mo go Luka 17:7-10.
4. A go ipolelwe tumelo ya bokeresete!
5. Sefela sa 187 - 173/180
6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 20:1-16a, e re: "'Gonne Puso ya magodimo e tshwana le motho yo e leng mong wa ntlo, yo o phaketseng, a ya go thapela tshimo ya gagwe ya moweine badiri. Ya re a sena go dumalana le badiri ka ranta e le nngwe ka letsatsi, a ba romela kwa tshimong ya gagwe ya moweine. Ya re a tswa, e ka nna ka nako ya borobongwe, a fitlhela ba bangwe ba eme mo patlelong, ba sa dire sepe. Le bone a ba raya a re: 'Le lona yaang kwa tshimong ya moweine, mme se se siameng ke tla se lo naya.' Mme ba ya. A tswa gape, e ka nna ka nako ya motshegare le ya boraro, a dira fela jalo. Ya re e ka nna nako ya botlhano a tswa a fitlhela ba bangwe ba eme fela; a ba raya a re: 'Lo emetseng fano letsatsi lotlhe, lo sa dire sepe?' Ba mo fetola ba re: 'Ke ka gonne ga go na ope yo o re thapileng.' A ba raya a re: 'Le lona yaang kwa tshimong ya moweine; mme se se tshwanetseng lo tla se bona.' Ya re go le maitsiboa, morena wa tshimo ya moweine a raya motlameledi wa gagwe a re: 'Bitsa badiri, o ba amogedise dituelo tsa bone, o simolole ka ba morago, o fetse ka ba ntlha.' Ya re go tla ba nako e e ka nnang ya botlhano, mongwe le mongwe a amogela ranta e le nngwe. Ya re ba ntlha ba tla ba ithoma gore ba tla amogela bogolo; mme le bone mongwe le mongwe a amogela ranta e le nngwe. Ya re ba e amogela, ba ngongoregela mong wa ntlo ba re: 'Bao ba morago ba dirile nako e le nngwe fela, mme o ba lekantse le rona, ba re itshoketseng letsapa la letsatsi le mogote.' Ene a fetola mongwe wa bone a re: 'Tsala, ga ke go siamololele; a ga o a dumalana le nna ka ranta e le nngwe? Tsaya se e leng sa gago, o tsamae; ke rata go naya yo wa morago fela jaaka ke go neile. A ga ke a

letlelelwa go dira se ke se ratang ka tsa me? A kampo leitlho la gago le bosula, ka ke le molemo?' Ka mokgwa o o jalo ba morago ba tla nna ba ntlha le ba ntlha ba morago." Amen.

**8. Thero:** Phuthego ya Morena, re reng ka tiragalo eo? Re reng ka Efangele eo? Re na le dipotso tse dintsi. A Modimo o a kgetha? A o rata ba ba tshwakgafetseng, le ba ba sa direng? O duela jang? Fa go tsamaiwa jalo, go thusang tsotlhe, go itshwenyegela, le go fufula ga rona? A ga se botoka go tshwakgafala, le go ikhutsa fela, re robale sentle, re tsoge motshegare, re dire ka fa re ratang ka teng, re ise re ye mo tshimong ya moweine? Kana re lemoga ka pele gore re a fosa ka go gopola jalo, re ya mo sekgweng, re timela fela. Go bonala ka pele, fa Modimo ga o tsietse motho fano. Ga a tsietse ba ba tlileng mo tirong phakela. O ba neile ka fa o ba solofeditseng ka teng. O ba duela ka fa tumalanong ya bone, ka fa tsholofetsong ya gagwe. Go kwadilwe gore "Ya re a sena go dumalana le badiri ka ranta e le nngwe ka letsatsi, a ba romela kwa tshimong ya gagwe ya moweine." Ke gore fa a ne a utlwela bone botlhoko ba ba tlileng morago. O ba abetse tse di fetang tlwaelo, tse di tshwanetseng. Ga go diragale mo botshelong jwa malatsi otlhe. Morena o tshwantsha fela ka fa go tsamaiwang mo pusong ya Modimo ka teng.

Re a lemoga gore ka Efangele eno ga go buiwe ka ga tiro mo dipolaseng, mme e bua ka ga puso ya legodimo. "Gonne Puso ya magodimo e tshwana le motho yo e leng mong wa ntlo, yo o phaketseng, a ya go thapela tshimo ya gagwe ya moweine badiri." Puso ya Modimo ga e tshwane le puso ya lefatshe. Modimo ga o tshwane le rona. Ga ke letlelelwe go dira se ke ratang go se dira fela ka fa ke ratang go se dira ka teng. Morena o a botsa a re: "A kampo leitlho la gago le bosula, ka ke le molemo?" Modimo o ne wa utlwela Setefano botlhoko, ene yo e neng e le moswela-tumelo, wa utlwela Saulo gore a nne Paulo fela jalo botlhoko, le fa e ne e le mmogisi wa badumedi, a disa diaparo tsa babolai ba ga Setefano. Mopholosi wa rona Jesu Keresete a utlwela Lazaro tsala ya gagwe botlhoko, fela jalo o ne a utlwela senokwane sengwe sa tse di bapoletsweng mmogo le ene mo sefapaanong, a se solofetsa, a re: "Ammaaruri ke go raya ke re: Kajeno o tla nna le nna mo Parateiseng." Bana ba amogelwa ke ene, le ene Petoro yo o neng a mo itatola gararo. Monnae Marta, e bong Maria o ne a amogelwa, fela jalo seaka sele ga se a latlhwa ke ene.

Re a ipolela ka tlhaloso ya Artikele ya ntlha ya tumelo ya bokeresete re re: "Tse tsotlhe tseo o di ntirela fela ka ntlha bopelontle jwa gagwe le boutlwelobotlhoko jwa gagwe, ka e le Rre le Modimo wa me, nna ke se na tshiamo, le fa e le tshwanelo epe." Kana, re ka ngongorega jang, fa moleofi yo o tihomolang pelo e e latlhegileng e bona tsela go boela mo lesakeng la Morena, a tla go kopa boitshwarelo mo phuthegong, bogolo ka le rona re itshwaretswe fela jalo, jaaka go kwadilwe mo go Baef. 2:8-9 gore: "Gonne lo pholositswe ka boitshwarelo ka

tumelo, mme ga go tswe mo go lona, ke neo ya Modimo. Ga se ka ditiro, gore go se nne ope yo o ipokang.” “Ke ka moo ke tshwanetseng go mo leboga, le go mo tumisa, le go mo direla, le go mo utlwa. Tseo ke nnete ruri.”

Ke ka ngongoregela bopelotlhomogi jwa Modimo jang? Kana bopelotlhomogi le bopelontle jwa gagwe bo feta go kopa le go tlhaloganya ga rona ka metlha! Ke ka ikgodisa bogolo go motho yo mongwe yo o timetseng, yo o ikepileng yo o mo kotsing ya ga latlhwa, ke re: Ke a mo feta ka bontle? Go ntse jang, bagaetsho? Ke ka ikgodisa jang bogolo go ba ba iseng ba apare diaparo jaaka nna? A re rata go ikgodisa ka go bua gore Re tshwanetse go duelwa bogolo. Morena a re: “Ke rata go naya yo wa morago fela jaaka ke go neile. A ga ke a letlelelwa go dira se ke se ratang ka tsa me? A kampo leitlho la gago le bosula, ka ke le molemo? Ka mokgwa o o jalo ba morago ba tla nna ba ntlha le ba ntlha ba morago.”

Tota, ga re rate go ngongorega, fa letagwa le kokonya teng, gongwe molai, gongwe motsietsi, gongwe lekgarebe le le botlhofo, gongwe batho ba matlo a masedi a khibidu, gongwe ba ba latelang dipolitiki tse dingwe, gongwe ba morafe o mongwe. Nna le wena re ne re letlhogonolofetswe thata. Ra amogelwa mo phuthegong ya Morena, ra kolobediwa re ntse re le masea. Ra kopelwa kolobetso ke bagolo ba rona ka fa bopelotlhomoging jwa Morena. Lesedi la boutlwelobotlhoko jwa Morena jwa re sedimosetsa mo tseleng yotlhe ya rona go fitlhela kajeno. Re na le letlhogonolo tota ka go godisiwa ka fa thatong ya Modimo gore re tshelele Morena, go ya mo losong. Re tshegofaditswe ka go tshela ka kgomotso ya Morena ka letsatsi lengwe le lengwe, le ka ya sakramente se se boitshepo go tswa mo bokaung jwa rona. Ke tshegofatso e e sa ka keng e bolelwa ka mafoko a motho. Kana re itshwarelwa maleo thata mmogo le badumedi botlhe ka malatsi otlhe. Ke tshegofatso e kgolo, fa bagaetsho ba tshela mmogo le rona mo tumelong eo ya go itshwarelwa ka malatsi otlhe ka ntlha ya loso le tsogo ya ga Jesu Keresete, fa ba re rapelela, jaaka re ithapelela ka nosi.

A nna yo ke tshegofaditsweng mo go kalo, ke ka ngongorega, fa go amogelwa motho wa morafe o mongwe, gongwe moleofi yo o tlang go kopa boitshwarelo, ya re a sena go tshela dinyaga mo boikepong? Ke ka ngongorega jang, fa Modimo o amogela moagisanyi yo o tshwenyang ka malatsi otlhe, mme a amogelwa ke Morena ka boitshwarelo jaaka nna? Lefoko le le okamelang beke eno le re: “Ga re ikanye ditiro tse di siameng tsa rona, fa re baya mekokotlelo ya rona fa pele ga gago; mme re ikanya mautlwelo-botlhoko a magolo a gago.” Go ntse jalo. Rotlhe re tshela ka bopelotlhomogi, re tswela pele ka jona, re a bo hema, re pholosiwa ka ntlha ya jona. Tsotlhe di diragala ka fa bopelotlhomoging, fa baleofi ba amogelwa. A re tlhokomeleng Luka 15:25-32 fa re raelwa go ngongoregela ba ba boelang mo go Rara wa bopelotlhomogi. Morena o re botsa kajeno, a re: “A kampo leitlho la gago le

bosula, ka ke le molemo? Ka mokgwa o o jalo ba morago ba tla nna ba ntlha le ba ntlha ba morago."

Ke re: Re utlwile. "A ona o o nonofileng go dira bogolo go feta le tse re ka di gopolang ka fa thateng e e dirang mo go rona, a kgalalelo e nne ya ona mo phuthegong le mo go Keresete Jesu go ya tshikatshikeng tsa bosakhutleng. Amen."

**9. Thapelo:** Rara yo o mo legodimong, ka taolo ya ga Morwao o re roma go dira mo tshimong ya moweine, mo kerekeng ya gago gore re dire ka boitumelo le ka go ikanyega, re se ngongorege, re se fufegele, re se nne le matlho a a bosula. Ke gona re kopang gore o re abele pelo e e lebogelang bopelotlhomogi le bopelontle jwa gago, re lebogele badiredi ba re dirang mmogo le bone, re nne re gakololane, re tshegofatsane, re dire, re direlane ka boitumelo, rotlhe re amogelwe tshegofatso ya gago, gape o re rute go rapelela badumedi, le ba ba iseng ba dumele, le e seng go kolobediwa gore ba tlabologele mo go Keresete, ba ikopele kolobetso, ba tshele mmogo le rona ka go itshwarelwa ka malatsi otlhe mo kerekeng. O re utlwe ka ntlha ya ga Jesu Keresete, Morena, Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 184 - 170/177

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.